

Katia Ricciarelli cianta per solidarietà

La tol pèrt a n concert de benefizenza te teater Navalge a Moena en sabeda ai 23 de mèrz

Conzerc - Per la pruma outa rua te Fascia la cognosciuda ciantarina Katia Ricciarelli. La soprana, anter la più amèdes del mond, portarà dant sia cianties liriches ensema al tenor Luca Canonici e l bariton Bruno Praticò compagne dal pianist Vincenzo Irelli e la l farà per benefizenza.

L'ocajion l'è l concert "Music for Love" a favor de la sociazion "Sri Prema Sai Organization Onlus" che se dèsc jù te vèlch una de la zones più puretes de l'India, ma ence su la costes asiatiche dessatèdes dai tsunami e te lesc del Nepal e de la Telia tocè dal teremot.

"Katia Ricciarelli colaborea con nos jà da n an – à dit Anna Bruno, che con so om Luigi Ferrante, documentarist e scrittor, la vida la sociazion – e l'ha tout sù con gran gaissa nesc projec, tant che prest la jirà te l'India per cognoscer l'ativitèdes enièdes via."

La soprana é restèda tocèda da la gran opera de Anna Bruno che spen sia vita per i purec, en particulèr chi de l'India meridionèla ti lesc vejin a Channapatna, n picol zenter del stat de Karnatka, olache acà 5 egn l'ha metù sù "l vilaje de la ciarità" e dachelanvia

les é doventèdes gran amiche.

Te l'India, de gra al lurier de Bruno e Ferrante e de sacotenc volontères taliegn, svizres e ingleisc, l'è stat endrezà strutures olache, a n muie de bec e gregn che se troa te condizions de meseria, ge vegn sport bèsc, cures mediches e ai più picoi ence guanc e material de scola, a na vida che i posse jir a scola mingol più degnitouse.

"Sri Prema Sai Organization Onlus", che per sia atività l'ha ciapà n recognosciment ofizial dal goern indian, l'ha en program de smaorèr la cèsa che ge dèsc alberch a la mères che compagna i bec malé al prum socors del vilaje, olache n dottor e vèlch infermiera ge dèsc cures de ogne sort. Per miorèr acolienza e prestazions sanitères l'è en program ence l smaorament del prum socors che cognessa doventèr desche n picol ospedèl con n repart per i bec picoi.

"L concert te Fascia – à dit amò Anna Bruno – l'ha l'obietif de tor sù bonamans per la pediatria e la cèsa de la mères. Cognoscion l bon cher di sentadins de Moena che sostegn nesc projec umanitariaries da passa vint egn, desche ence di sentadins de Fascia e Fiem. Sion segures che, ence de gra a la straordenèra prezenza de Katia Ricciarelli, de Bruno Praticò e de Luca Canonici, ensema al prejentador, l'ator Ivan Bellandi, i mosciarà duta sia solidarietà."

Al concert, en program te teater de Navalge en sabeda ai 23 de mèrz da les 20.30, se pel esser prejent ence da dalonc: con la scomenzadiva "Sporc na poltrona" se pel lascèr n post prenotà a chi che volessa tor pèrt. Per domanèr "n envit su donazion" se pel chiamèr o manèr n messaje al 333 3374768 o na mail a annabruno.newworld@gmail.com. La donazion é a oferta ledia: chi che no pel dèr na bonaman pel durèr l post sport da n amich dalonc.



La soprana Katia Ricciarelli cianta a Moena.